

掃便所的心適代

劉思瑤

「來，咱等一下欲換摒掃工課，這改予恁家己抽。」Uah！閣欲換工課矣，這是予人期待閣驚受傷害的心情，因為阮這班摒掃的區域，包含一間全校上恐怖的便所，咧用這間便所的，齊是低年級的猴囡仔。

人講串驚串著，你愈無想欲拄著的，就愈會來揣你。買彩券嘛無遮好運，兩張掃便所的單仔，就予我抽著一張，天公伯仔，你哪會對我遮爾好啦！阮老師講，若有才調共便所掃甲予你家己都會想欲去遐散放，按呢就成功矣。阮學校的便所佇我讀二年仔的時陣有翻過，新的便所會使講是海線地區的國校上婿、上先進的。毋過經過這兩年，予逐家跔跔甲已經失去伊原本的模樣囉！

頭一擺去摒掃的時陣，我險仔共早起食的早頓吐吐出來。尿斗卡一沿尿滓黃黃厚厚，臭尿簽味對樓梯行落來就鼻會著；兩間便所的壁頂、塗跤、馬桶攏有潑著黃

金，垃圾的衛生紙嘛抨甲規四界，因衛生紙的所在閣擲一領穿過的內褲，誠癩癩，今這是發生啥物代誌？是遐的猴囡仔放尿相袂準？抑是共放尿當做咧沃花捎咧烏白漩？黃金的來源是上課毋敢共老師講屎咧滾，等到屎攞尻川矣才咧揣便所，所致走袂赴就沿路落？袂記得紮衛生紙只好用內褲拭？繼落來垃圾的內褲規氣褪掉無愛穿？抑無，一間「五星級」的便所，哪會舞甲這號形。

我從轉去教室共老師講這個狀況，老師來看了，隨提一罐洗碗精、一罐酒精恰兩副手囊予我，叫阮兩個共摒予清氣，我閣加掛兩個喙罌，準備欲來恰伊揸拚。頭起先，阮兩個攏無想欲去處理遐的垃圾仔，毋過遮的物件無清掉，賭的工課嘛袂做得，阮只好用喝拳彼步，贏的人愛處理。天公伯仔閣恰我滾耍笑，又閣是我啦！真正是欲哭無目屎。

我這個愛清氣相的看袂做得，就早暗拚命鑢，經過兩禮拜，總算共尿滓和黃金攏鑢掉矣，阮共彼間全校上癩癩的便所，洗甲金爍爍閣清氣溜溜。

這馬我攏會專工對樓頂走落來用這間我家己摒的便所囉！

教室裡的熱天

陳惠珠

聽老師講教育部為著欲予學生因仔佇學校有閣較四序的學習環境，教室欲安冷氣，這個逐班攏有冷氣的好消息予阮心內足歡喜的。「敢有影？後擺熱人有冷氣通吹矣！」「誠實的喔？佇教室嘛有冷氣通吹！」逐个人攏毋敢相信這是正經的，嘛足期待彼工較緊到咧。

下學期開學了後，冷氣已經安起去矣，看著咧欲有冷氣通吹，阮逐个攏喙笑目笑。無佸久，教室的冷氣欲試看有啥物問題無，老師交代阮愛會記得加紮一領外套來學校，若準講傷冷著愛疊外套才袂去寒著。雖罔冷氣無問題，毋過著等天氣變熱才會用得使用。

清明連假天氣有加較燒熱，不而過教室冷氣使用規則有講，佇高溫的月份，室內的溫度超過二十八度才會使得開冷氣。

六月天火燒埔，真正會熱死人！教室裡有夠鬱熱，學校規定分樓層開冷氣，避免全校全一个時間啟動冷氣

電力，致使超出契約容量。諄！這阮毋知啦！教室內底活欲熱死，人感覺誠齷齪，阮干焦想欲較緊吹著冷氣。上早是五樓九點會當開冷氣，繼落來是四樓九點十分，才閣輪著阮三樓。時間欲到矣！老師早就共冷氣卡恰遙控器攢好勢，九點二十一下到，甯、甯兩聲若親像佇咧共阮喝講：「緊共我開開！」緊！緊！緊！阮三步做一伐，毋免老師吩咐，逐个跤手攏誠猛掠，隨倚起來關頭前門、後壁門、窗仔門，老師緊押遙控器共冷氣開開。無一觸仔久那來那涼，袂閣再頭昏昏腦鈍鈍，規个人精神攏好起來，逐个攏歡頭喜面開始認真上課囉！

猶毋過有當時仔阮老師踎教室煞袂得吹冷氣，啊都冷氣卡獨獨一張爾爾，便若阮去別間教室上課，就會共冷氣卡紮去，老師毋才無冷氣通吹。老師有夠可憐，佇遐爾仔熱的教室內面改簿仔，定定看伊改甲大粒汗細粒汗，三不五時提手巾仔咧拭汗。見擺阮欲排隊去別的所在上課，老師攏會向望阮下課愛較緊轉來咧。老師，阮知影啦！下課阮會緊轉來教室，共冷氣卡交予你，予你會得恰阮做伙吹冷氣吹甲涼涼涼。

好料的排桌頂

鐘育紋

平常時仔，阿母和阿爸真要意阮的食食，講欲有康健的身體，逐日囡入喙裡的食物就愛真注意，傷甜的、過頭鹹的、濫真濟添加物的、加工過的，攞會予拍出籠外。所致阮兜的飯桌頂蓋少出現外口的物件，連阮囡仔人拜一到拜五跔學校食晝，阿母嘛會攢便當予阮紮去炊，有閩縫閣家已做饅頭、包水餃、縛肉粽……，伊講按呢食著較安心。

阿姊安親班的老師共阮講，頂學期尾學生仔表演甲足精彩的，老師恁恁去便利商店揀一項仔恰意的，逐个人都歡喜甲袂顧得，糖仔餅仔、枝仔冰、涼的、甜路的攞有人提，想袂到阮阿姊行來覓去相規半晷，落尾煞提一盒白泚無味的sa-la去排隊。老師看一下愣去，伊講伊教冊教遮濟冬，無看過囡仔生做這號款的啦！

毋過阮逐冬攞有幾日仔會和健康的食食相閃身一下，歇熱阮會轉去外媽遐跔一兩禮拜，阿姨參阿公、阿

媽做伙蹠，伊和阮阿母雖然是全腹生的，閣是做伙大漢的，毋過阿姨食食的口味加真重，閣特別慳慳食簽。頂改阮參伊去食麵，看著伊叫的彼碗特別簽的麵，湯頭是油燙燙閣紅絳絳，我干焦看嚟喉就誼tòng-tòng，阿姨煞那食那喝讚，食甲面仔強欲著火，伊猶是笑頭笑面規碗食了了。

便若歇熱轉去阿媽個兜，阮這陣囡仔又閣有食福囉！因為阿姨攞笑講伊參阮阿母平骨力，不而過骨力的所在無全。伊是骨力買好食物、綿爛試新口味，嘛足興去排隊的！便若阮轉去，早頓若毋是久無食就會癮的飯丸、碗粿，就是眾人呵咾少人嫌的九重粿、米糕、煎包……，逐工都換新換新。阮是看甲目調金金，喙瀾湑湑津。中晝阿媽會款鹹廩、粿仔、大麵鹼，逐項嘛好食甲會觸舌。到甲暗時，阿姨閣不時共桌頂排甲滿滿滿，某也出名的鹹酥雞、滷味、蚵仔煎，食飯飽閣有仙草、檸檬菓菓、牛奶茶、梅仔茶遮的好食物，橫直無共阮飼甲圓棍棍，阿姨是無拍算欲予阮轉去的啦！啊！阮這幾個又閣拗指頭仔咧算矣，今年歇熱是當時欲轉來去阿媽個兜迢迢迢？